

159 52.

# DEO OPTIMO MAXIMO.

UNI ET TRINO,

VIRGINI DEI-PARÆ, ET S. LUCÆ

Orthodoxorum Medicorum Patrono.

## QUÆSTIO MEDICA,

QUOD LIBETARIIS DISPUTATIONIBUS

manè discutienda in Scholis Medicorum, die Jovis V. mensis

Januarii, anno Domini M. DCC. LXIV.

M. CAROLO DIONIS, Rei Herbariæ Professore,  
Doctore Medico, Præside.

*An sub finem Febris malignæ Kina-kina?*

### L.



UID febris? merumne phlogisticon, ut Græci appellant νόσος? an impura colluvies, & malum fermentum, ut innuere videtur vox latina Febris, quam ab obsoleto verbo, *februo*, derivant? An utrumque? motus-ve aliquis inconditus? Ubi primum oritur, an in genere nervoso? An in sanguine? De his, & similibus multum hæcenus disputatum est, sed frustra licet ab eruditis; ergo vera febris natura adhuc est, tam in obscuro, quam in aperto sunt effectuum varietas, & frequentia. Egrotare, idem ferè est ac febrescere. Mors sine febre non furit. Febrilis æstus intensitate, duratione; loco differt. Pro diversâ indole varia febrium cognomina. Febris maligna, febris pravi moris antiquorum, principio nihil mali præfigit, nec citò noscitur, per totum quandoque decursum fallaci fronte benignitatem mentitur; interea occulto lapsu functiones lædit præcipuas. Perit æger Medico periculi inscio, Febres malignæ omnes variæ pro locis. Pejor, & atrocior in castris, nosocomiis, & carceribus, vere, & autumnò, si tempestas, calida, & humida sit. In sporadicam, & epidemicam dividitur. Epidemica putridarum more grassatur. Malignum febris malignæ contagium. Frequentissimi comites, morbilli, variolæ. Sæpe bubones axillis, scapulis parotides, & abscessus. Nonnullos, quibus funera vitare contigit, manent amaurosis, surditas, imbecillitas; quæ sensim evanescent, nisi quis imprudens topica, & saphenæ sectionem prescribat. Causa proxima videtur esse paucitas, & depravatio spiritus vitalis. Num aliam inaurit virium prostratio, languor, torpor, tendinum subsultus, coma, & delirium fugax? Causæ remotiores, nimius labor, studia nimia, gravis, & diuturnus moror, venus immodica, laxa temperies, usus ciborum faciliè putrescentium, excretiones retentæ. In febre malignâ, tempora spectanda quatuor, initium, incrementum, status, seu vigor, & declinatio. Morbi initio afflicte vires, æger segniss, morosus, doloris expertus, pulsus, lingua, urinæ secretiones, vix à statu sanò recedunt præter vires projectas. Incremente morbo, plurimi poraceas sordes evomunt. Stringitur ventriculus, unde cardialgia. Tumescit abdomen, pectus anhelat. Caput dolet, artus quasi dilacerati. Vigilia pertinax, & ferox. At insignis in facie mutatio mali omnis. Tremula, & retorta lingua, impedita vox. Stante morbo, jam nullus ferè cervicem urget dolor, sed assidua somnolentiâ. Si expurgant, delirant, & varia phantasmata

quieti contemplantur. Hæc autem lethum prænuntiant, & sitis modica, trux, & rubra facies, siccæ fauces, & inflammata, scintillantes, vel obscurati oculi. Si pulmones vitientur, idem ferè accidit, atque in pseudo-peripneumoniâ; anhelitus difficilior; cutis ardens, rigidus, & horrescens, pulsus, crebriores tendinum subsultus, sensus hebes; dein animi deliquia, convulsiones à digitis ad caput: finis sævitæ mors. Luctuosum illud malum: non verò ita frequens, quam multi clamitant ex pseudo Medicis. Illi, vel propter inscitiam, vel ut faciant fucum, opus adeo periculosum non dubitant fingere vel ultra legem, & vires tractare non erubescunt.

## I I.

**I**N morbis acutis sanitatem restituere: penè exhaustam, res maximè ardua. Facile quidem est recensere remedia; febris-ne vehemens, & inflammatoria? Copiosis, & iteratis venæ sectionibus, largo potu, & antiphlogistico extinguitur. An primæ culinæ sæburra febrem creat, & alie? Emetica, & cathartica eam extrudunt. Ubi fibris cerebri laxioribus, aut aliâ quâvis causâ irritante, humores in caput uberius confluunt, mittatur sanguis è sapientiâ, minuetur partium inferiorum resistentia; applicetur emplastrum vesicans; ibi major erit irritatio, unde simul derivatio humorum, quâ pars superior levabitur. Hæc in genere praxis vulgarissima. Sed inter febres acutas maligna præsertim universam Medici prudentiam desiderat. In primâ ejus invasione, corpus vergit ad putredinem; huic imprimis præcaveatur. Prodesse potest è brachio, dein è pedè sanguinis missio; non iteranda, quam vix paterentur projectæ vires, & quæ alioquin alkalescentiæ semen non aboleret. Ubi coma, & delirium, applicentur temporibus hirudines, aliquando vertici, aut occipiti cucurbitulæ. Cardialgia, & Vomitus morbi præcensis indices tartari stibiati largam dosim appellant. Sic qualitato corpore, torpor excutitur. Deinde porrectis manibus, & sale glauberiano cum sero lactis, ægrum brevi sanatum crederes. At post horas 30 circiter symptomata eadem plerumque graviora redeunt. In decursu morbi, duocutæ sunt, unum, ut alvus fæces liberè mittat, alterum ne propagetur latius purridum febris fermentum. Eo conducunt acida, qualia sunt aurantia, berberis, Grossulariæ, maritanda cum laxantibus, aut seligenda acida ipsamet laxantia, v. g. tamarindi, cassia, pruni sylvestres, quibus tartarum stibiatum ritè admisceatur. Placent medicamina paululum aromatica, sic flores chamæmeli cum nitro. Utramque potionem amarâ, & acidam prudentissimè alternabis. Interdum aqua orizæ, & hordei pro alimento. Arceantur juscula carniû, nisi levissima. Cerebrum fatiscit, torpent, & rarescunt spiritus, attritæ vires, levandum cerebrum, erigendæ vires. Cæteris præstant camphora, & crocus. Viribus ita prostratis, quantocius applicentur cantharides, quarum vis irritans spiritum vitalem extimulat, expedit robur, inimò liberat à petechiis, & maculis miliaribus. Natura molitur undequaque vias, quibus malum abigat. Auxiliantur vesicantia bis, ter, quaterve. Lentè hæc omnia fiant, & sapienter. Rarò morbus ante vigesimum diem terminatur. Clysteria unum, vel duo, singulis diebus, si opus, excretiones promoveant. Aceti inflammatori vapor diffundatur per cubiculum, & aer quotidie renovatus pulmones agrotantis recreet. Exeunte morbo, cathartica largè ministrentur mixta cum dosi sufficienti corticis Peruviani. Instituenda hæc methodus pro temperamenti, ætatis, sexus, tempestatis, & loci diversitate. Tam dosi remedium, quam sumendi ratio accomoderetur.

## I I I.

**Q**UINA. quæ vox, ut suspicatur *Clar. Vir Dominus de la Condamine*, apud Peruvianos significat corticem. Dicitur reduplicativè Quina-quina, quasi præstantissimus corticem. Non idem, prorsus apud nos eo nomine celebratur, qui etiamnum apud Americanos. Exoptandum foret, ut quo utuntur Peruviani, ille fortassis potentior nobis adveheretur. Noster, cui in solo natali nomen est \* *Corteza*, vestit arborem frequentem in montibus provincie Quitensis, ubi recta crescit inter alias, quibus supereminet, Folia læ-

\* Voyez le Mémoire de l'Académie des Sciences, an. 1738, pag. 226.

via, lata duos pollices, longa verò tres circiter, cuspidata anteriùs, posteriùs subrotunda, viridiora inferiùs, quam superiùs, caudæ dimidium pollicem. Costa per mediani longitudinem excurrit, ex quâ nervi laterales ad oras alternatim obliquant. Extremum quemque ramum decorant, unus, vel plures florum fasciculi, figurâ, & colore caruleo-cinereo, lavandulæ flores nonnihil imitantium. Singuli calices gerunt flosculos, quales ferè hyacinthi, seu formam spectâs, seu magnitudinem. Ubi flos decidit, calix turget medius ad modum olivæ, crassescit, & mutatur in fructum in duo loculamenta partitum; fit brevior, & magis rotundus, quo plûs arefcit. Denique dehiscit deorsum in duas semiconchas, quas septum separat, & induit pellicula sublutea lavis, & tenuis, unde simul erumpit semen subrotundum. Varia pro solo corticis virtus. Primo intuitu melioris notæ censetur, cuius idem ac cinnamomi color, sapor sat gratus, & aromaticè amarus, odor peculiari modo nucidus, suavis tamen, & balsamicus. Denique sit friabilis, nec glutinosus: pro supposititio habendus injucundè amarus, ac intensè acerbus. Viscosum & liquore aliquo tenaci saturatum, censemus adulterinum, & rejicimus. Deprehenditur effectus, si insipidus, & præcipuè si non amarus: putridus, si contrectatus abeat in pulverem.

Corticis analysi chymica probat contineri copiosas partes terreas. Contendunt alii substantiam fixam gummeo-resinosam, plûs tamen resinæ magis amaræ, & febrifugæ, quam gummi, utrumque coherens arctissimè unde neutrius perfectæ extractio, partes volatiles paucissimas, & debiles, oleum essentielle ferè nullum; alii appellant hanc substantiam extracto-resinosam. Aquâ si cortex infundatur, primò tingitur aurantiò colore: parum olet, amarum sapit. Post evaporationem, in residuo color flavo-fuscus penè nullus odor, sed major quàm antea amarities. Kina-kina, ut quædam amaræ plantæ longam potest ebullitionem, virtute non multum læsâ; cui igitur extrahendæ optimè inserviunt vinum, spiritus vini, & aqua vitæ. Illa ultima, juxta plurimos, ad tincturam præstat, quod quasi media intercedat, ut nimii phlegmatis, sic expers nimii spiritus; quamobrem citius dissolvit partes gummeo-resinosas, vel extracto-resinosas, in quibus vinum medicaminis sitam autumant.

## I. V.

**C**ORTICEM Peruvianum prodesse sub finem febris malignæ probatur promptius, quàm intelligitur. Quare, & quantum remedia prosint, in disceptationem venit. Rem extra dubium, jam pridem statuit Magistra vitæ experientia, quam sequi ducenti nunquam nos pudeat. Modum explicat ratio rectè, & cumulatè, cum profert nihil, nisi consonum experientiæ. In confesso est apud omnes corticem nostrum pollere præcæteris quâdam vi amicè astringenti, & tonicâ, ad quam referri possunt stomachica, & antiputrida. Ager quem maligna febris depasta est, indiget medicamine hîcæ doli-bus prædito. Fibræ corporis laxatæ, languet iners, aut infirmatum nativæ oscillationis elaterium. Marcescit stomachus debitæ digestionis impotens, & impar elaborando eximiam moris chylo, unde restaurentur vires. Est ut credas subsidere intra meatus febris luedidæ fedatos, & hæere plurimas fordes, quibus cognoscitur præpediri motus solidorum, & fluidorum reciprocos. Vascula, cerebri languidè compressa, flaccescunt. Ipsummet cerebri quasi inane stupet, deficiente debitâ spirituum copiâ. Quid in eorum discrimine cortex salutifer? Videtur spirituum gerere quasi vices, movere, & rarefacere sanguinem, & illius, ut ita loquar, pristinam supplere facultatem, donec sensim recreata sit. Vasculorum irritat tunicas, & ad contractiones celeriores egregiè invitat. Tum oscillationes amplius vibrari & vividius, canaliculorum diametrum aliquatenus protendi; velocitatem circulationis crescere, simul robur. Cæteris paribus eò plûs animalia vigent, quò citius meat sanguis: hæc virtutis tonicæ. Tum astringens fibrillulas divaricantes decenter retractans consociat, & dirigit adamussim, villosam ventriculi membranam blando stimulo percontat, & refovet, defuetantque cibi appetentiam revocat. Ex utrâque virtute conjunctâ, existit antiputrida, quâ fermentum febrile, residuum abstergitur; expellitur germen noxium, si quid remanet aut ad meliorem frugem reducitur. Non rara pro-

bant exempla cortice Peruviano gangranam quandoque desperatam feliciter debellari. Illum etiam, non absumile vero est, invehere secum per totam corporis seriem, nonnullam balsami copiam, quâ resectæ invalidæ partes ad perfectam sanitatem alacrius conspirant. Ad alios etiam morbos roborante suâ vi profigandos debilissimis hominibus datur. Sic viris hypocondriaciis feminisque histericis manè, & vespere scrupulum Kinkina dedit Sydenhamus per multas septimanas, diu multumque agrotantibus dejecta jam quasi œconomia foret, integram tædiosi hujus mali curam solo hoc remedio se perfecisse testatur.

V.

**N**ONNULLI meruent ne cortex Peruvianus imbecilla exsiccet, & incendat præcordia, nativi caloris residuum dissipet, & vitæ pabulum depopuletur. Nempè huic amaro objicitur stipticitas, & adstrictio. Non disitemur levem quamdam adstrictionem, sive austeritatem inesse cortici; sed inde viscera inflammari nimis, & extenuari spiritus vitales pernegamus, nonne aloë, rhubarbarum & alstringente, ac stipticâ qualitate, necnon calidâ imbuuntur? Quis ea unquam conquestus fuit noxios ignes in corporibus accendere? Neque exprobrandum quod meatus obstruat, atque hinc febris terminetur in difficiles morbos chronicos, hydropem, scorbutum, ictærum tumoresque scirrhusos abdominis. Omnia hæc mala nullo jure cortici tribuuntur; multoties evenerant antequam Europæis innotuit. Damna hæc sunt incuriæ medentis, non remedii ex suâ indole innoxii. Aliquoties recidivam febrem, aut paroxysmum ferociorem æger patitur: quid hoc ad corticem? Culpentur qui ipsam debitâ dosi, aut opportunè non exhibuerunt. Illius pharmaci usu constat febres citius ac certius fugari, quàm cæteris omnibus, & fugatas minus recrudescere. Hæc antidoto, multo plûs viget stomachus; coctio alimentorum felicitior; vegetiores spiritus vitales; generi nervoso robur adjicitur, & habitus corporis à statu tabido, & cachectico quasi divinitus in sanum, & validum mutatur.

*Ergò sub finem Febris malignæ Kina-kina.*

DOMINI DOCTORES DISPUTATURI.

- |   |   |   |
|---|---|---|
| <i>M. Carolus-Franciscus Theronide de Vallan, Eques.</i>                  | <i>M. Stephanus-Ludovicus Geoffroy, Societatis Botanice Florentine Socius.</i>                          | <i>M. Petrus Poissonnier, Regis in Sacro Consistorio Consiliarius, Regi à Consiliis Medicis, in Regiis arcibus Maritimis &amp; Colonis totius Medicinæ Præfatus, Imperialis Academiæ Petropolitana, necnon Regiarum Stokolmiensis &amp; Divionensis Academicarum Socius, Professor &amp; Censor Regius.</i> |
| <i>M. Anna-Carolus Lorry.</i>   | <i>M. Dionysius Pautier de la Breuille, S. S. Delphini &amp; Delphine Medicus Primarius designatus.</i> | <i>M. Antonius Le Camus, Academicarum Regiarum Rupellensis &amp; Ambianensis, Societatisque Literariæ Catalaunensis Socius, &amp; Scholarum Professor.</i>  |
| <i>M. Bernardus-Nicolaus Bertrand, Rei Herbariæ Professor designatus.</i> | <i>M. Natalis-Andreas-Joannes-Baptista Chesneau.</i>  | <i>M. Petrus Arcelin, Scholarum Professor designatus.</i>   |

Proponcbat Parisiis FRANCISCUS THIERRY DE BUSSY, Tullensis; Doctor Rhemensis, saluberrimæ Facultatis Medicinæ Parisiensis Baccalaureus, Theſeos Auctor, A. R. S. H. A SEXTA AD MERIDIEM.